

INFORMACIJA ZA OSIGURANIKE

SA INO OBRASCEM NA GODIŠNJI ODMOR

Poštovani osiguranici,

S obzirom na to da predstoji vrijeme godišnjih odmora, podsjećamo vas da za vrijeme privremenog boravka u inozemstvu možete da koristite zdravstvenu zaštitu o trošku Fonda zdravstvenog osiguranja ako vam zatreba hitna, neodložna medicinska pomoć, i to u onim zemljama sa kojima BiH ima potpisan sporazum ili ugovor o socijalnom osiguranju.

BiH ima potpisane sporazume o socijalnom osiguranju a koje obuhvataju zdravstveno osiguranje sa sljedećim zemljama:

Srbijom, Crnom Gorom, Hrvatskom, Makedonijom, Slovenijom, Mađarskom, Turskom, Nizozemskom, Austrijom, Njemačkom, Italijom, Belgijom, Luksemburgom i Češkom Republikom.

Šta je potrebno uraditi prije polaska na put?

Prije polaska na put treba da se javite svom obiteljskom ljekaru koji će vam izdati potvrdu ili nalaz i mišljenje o vašem zdravstvenom stanju, odnosno da li ste trenutno zdravstveno sposobni za putovanje. Naime, osiguranom licu će se izdati uvjerenje da je sposobno za put čak i ako boluje od nekih hroničnih ili akutnih bolesti, pod uvjetom da se ne nalazi u stanju koje će zahtijevati liječenje ili smještaj u bolnicu odmah po dolasku u inozemstvo.

Na osnovu uvjerenja obiteljskog ljekara i podnešenog zahtjeva u Fondu zdravstvenog osiguranja Brčko distrikta BiH izdat će vam se tzv. ino obrazac.

Fond zdravstvenog osiguranja Brčko distrikta BiH izdavanje ino obrasca ne naplaćuje.

S ino obrascem treba da se javite zdravstvenom osiguranju zemlje u koju putujete, gdje će vam se na osnovu njega izdati tkzv. bolesnički list kojega će te koristiti poput zdravstvene knjižice u slučaju da vam za vrijeme boravka u inozemstvu zatreba neodložna zdravstvena zaštita.

Takođe, u izuzetnim slučajevima, ino obrazac možete da uručite i direktno zdravstvenoj ustanovi u kojoj ste zatražili ljekarsku pomoć, a potom će zdravstvena ustanova kontaktirati nadležno zdravstveno osiguranje te zemlje. (Na poledini obrasca se nalazi uputstvo kako treba da postupite.)

Ukoliko se dogodi da vam pružanje hitne zdravstvene usluge ipak naplate, možete po povratku podnijeti zahtjev za refundaciju troškova.

VAŽNO

Ino obrazac važi samo u onim zdravstvenim ustanovama koje imaju ugovor sa zdravstvenim osiguranjem zemlje u kojoj privremeno boravite.

Na koji period se može izdati ino obrazac?

Ino obrazac se, kada je u pitanju privremeni boravak u inozemstvu iz privatnih razloga (kao što su godišnji odmori), može izdati na period do 30 dana u toku jedne kalendarske godine. Dakle, obrazac se može izdati više puta u toku godine, ali ukupan broj dana ne može da bude preko 30 dana.

Ukoliko se obrazac za vrijeme privremenog boravka u inozemstvu ne upotrijebi, moguće je prilikom ponovnog podnošenja zahtjeva priložiti neiskorišteni obrazac te tako imati mogućnosti ponovnog korištenja broja dana sa prethodno izdatog neiskorištenog obrasca.

NAPOMENE

- ⇒ FZO BD BiH pokriva troškove zdravstvene zaštite u inozemstvu (u navedenim zemljama) samo u slučaju da vam zatreba hitna medicinska pomoć, odnosno medicinska usluga koju nije moguće odgoditi, a da zdravlje ili život ne budu ugroženi;
- ⇒ ino obrascem se ne mogu pokriti troškovi "ciljanog" odlaska u inozemstvo radi liječenja;
- ⇒ ino obrazac se ne može izdati bez ljekarskog uvjerenja;

Želimo vam ugodan odmor, s nadom da vam ino obrazac ipak neće zatrebati 😊

**Vaš Fond zdravstvenog osiguranja
Brčko distrikta BiH**